



# ს ა ქ ა რ თ ვ ე ლ ო ს კულტურისა და სპორტის მინისტრი

## ბრძანება

N03/10

11 / იანვარი / 2018 წ.

ქ.თბილისი

**„სპორტული ორგანიზაციების აღიარებისა და დაფინანსების საბჭოს შექმნისა და მისი დებულების დამტკიცების შესახებ“ საქართველოს სპორტისა და ახალგაზრდობის საქმეთა მინისტრის 2015 წლის 4 ნოემბრის N01/1061 ბრძანებაში ცვლილებების შეტანის თაობაზე**

„საქართველოს მთავრობის სტრუქტურის, უფლებამოსილებისა და საქმიანობის წესის შესახებ“ საქართველოს კანონში ცვლილების შეტანის თაობაზე“ საქართველოს კანონის (N1620-რს, 7.12.2017წ.) მე-2 მუხლის მე-5 და მე-7 პუნქტებისა და საქართველოს ზოგადი ადმინისტრაციული კოდექსის 63-ე მუხლის თანახმად და საქართველოს კულტურისა და სპორტის სამინისტროს სპორტის პოლიტიკისა და მართვის დეპარტამენტის პირველი რანგის პირველადი სტრუქტურული ერთეულის ხელმძღვანელის/დეპარტამენტის დირექტორის ი. დოლაბერიძის 2018 წლის 10 იანვრის N415 მოხსენებითი ბარათის საფუძველზე,

### ვ ბ რ ძ ა ნ ე ბ ე:

1. „სპორტული ორგანიზაციების აღიარებისა და დაფინანსების საბჭოს შექმნისა და მისი დებულების დამტკიცების შესახებ“ საქართველოს სპორტისა და ახალგაზრდობის საქმეთა მინისტრის 2015 წლის 4 ნოემბრის N01/1061 ბრძანებაში შეტანილ იქნეს შემდეგი ცვლილებები:

ა) ამოღებულ იქნეს ბრძანების მე-3 პუნქტი;

ბ) ბრძანებით დამტკიცებული „სპორტული ორგანიზაციების აღიარებისა და დაფინანსების საბჭოს დებულება“ ჩამოყალიბდეს თანდართული რედაქციით.

2. ბრძანება ძალაშია ხელმოწერის დღიდან.

მინისტრი

მიხეილ გიორგაძე

# სპორტული ორგანიზაციების აღიარებისა და დაფინანსების საბჭოს

## დ ე ბ უ ლ ე ბ ა

### თავი I. ზოგადი დებულებები

#### მუხლი 1. სპორტული ორგანიზაციების აღიარებისა და დაფინანსების საბჭოს შექმნა და შემადგენლობა

1. საქართველოში სახელმწიფოს მიერ სპორტული ორგანიზაციების აღიარებისა და დაფინანსების მიზნით, საქართველოს კულტურისა და სპორტის სამინისტროსთან (შემდგომში - სამინისტრო) იქმნება სათათბირო ორგანო - სპორტული ორგანიზაციების აღიარებისა და დაფინანსების საბჭო (შემდგომში - საბჭო).

2. საბჭო თავის საქმიანობას წარმართავს შემდეგი შემადგენლობით:

ა) საქართველოს კულტურისა და სპორტის მინისტრი (შემდგომში - მინისტრი), საბჭოს თავმჯდომარე;

ბ) მინისტრის პირველი მოადგილე, საბჭოს თავმჯდომარის მოადგილე;

გ) მინისტრის მოადგილე (სპორტის სფეროს კურატორი);

დ) მინისტრის მოადგილე ან/და მოადგილეები (ფინანსური მიმართულების კურატორ(ებ)ი);

ე) სამინისტროს პირველადი სტრუქტურული ერთეულის - სპორტის პოლიტიკისა და მართვის დეპარტამენტის (შემდგომში - დეპარტამენტი) ხელმძღვანელი (არ ყოფნის შემთხვევაში, მისი მოვალეობის შემსრულებელი);

ვ) დეპარტამენტის მეორადი სტრუქტურული ერთეულის - სპორტის კვლევისა და ანალიზის სამმართველოს ხელმძღვანელი, საბჭოს მდივანი (არ ყოფნის შემთხვევაში, მისი მოვალეობის შემსრულებელი);

ზ) საქართველოს პარლამენტის სპორტისა და ახალგაზრდულ საქმეთა კომიტეტის ორი წარმომადგენელი;

თ) ა(ა)იპ - საქართველოს ეროვნული ოლიმპიური კომიტეტის ორი წარმომადგენელი;

ი) ა(ა)იპ - საქართველოს პარალიმპიური კომიტეტის წარმომადგენელი.

## **მუხლი 2. საბჭოს სხდომა**

1. საბჭოს სხდომები მოიწვევა წელიწადში სულ მცირე ერთხელ, საბჭოს თავმჯდომარის გადაწყვეტილებით.
2. საბჭო გადაწყვეტილებაზე უფლებამოსილია, თუ სხდომას ესწრება წევრთა საერთო რაოდენობის არანაკლებ ნახევარზე მეტი.
3. საბჭო გადაწყვეტილებას იღებს დამსწრე წევრთა შემადგენლობის ხმათა უმრავლესობით, ხმების გაყოფის შემთხვევაში, გადამწყვეტია საბჭოს თავმჯდომარის ხმა.
4. საბჭოს გადაწყვეტილება ფორმდება ოქმით, რომელსაც ხელს აწერენ საბჭოს თავმჯდომარე და საბჭოს მდივანი.

## **თავი II. სპორტული ორგანიზაციის აღიარება და დაფინანსება**

### **მუხლი 3. განხილვის დასაშვებობა**

1. საბჭო განიხილავს მხოლოდ იმ სპორტული ორგანიზაციის აღიარების საკითხს, რომლებიც დაფუძნებული არის არანაკლებ 6 თვით ადრე, აღიარების მოპოვების შესახებ განაცხადის წარდგენამდე.
2. საბჭო განიხილავს მხოლოდ იმ სპორტული ორგანიზაციის დაფინანსების საკითხს, რომელიც აღიარებულია არანაკლებ 6 თვისა.
3. აღიარების შესახებ განაცხადების მიღების თაობაზე ინფორმაცია ქვეყნდება საჯაროდ, სამინისტროს ოფიციალურ ვებ-გვერდის მეშვეობით (განაცხადების მიღების, დასრულებისა და განხილვის ვადების, წარსადგენი დოკუმენტაციის მითითებით)

### **მუხლი 4. აღიარებისა და დაფინანსების კრიტერიუმები**

1. საბჭო სპორტული ორგანიზაციების აღიარებისა და დაფინანსების საკითხის განხილვისას, სპორტული ორგანიზაციის საქმიანობას აფასებს საბჭოს მიერ შემუშავებული და მინისტრის ბრძანებით დამტკიცებული აღიარებისა და დაფინანსების კრიტერიუმების საფუძველზე.
2. სპორტული ორგანიზაციების დაფინანსების პარამეტრების განსაზღვრისას, საბჭო ხელმძღვანელობს დადგენილი კრიტერიუმებით, აფასებს ორგანიზაციის საქმიანობას ქულათა სისტემის შესაბამისად და ჯამური 100 ქულის ფარგლებში ანიჭებს მას ქულას.

### **მუხლი 5. კოეფიციენტის განსაზღვრა**

საბჭო სპორტულ ორგანიზაციათა წლიური დაფინანსების ოდენობის განსაზღვრამდე ადგენს პროცენტულ მაჩვენებელს, რომლითაც გამოითვლება ზრდისა და კლების კოეფიციენტი, შესაფასებელი წლის დაფინანსების ოდენობასთან შეფარდებით.

## **მუხლი 6. სპორტული ორგანიზაციის დაფინანსების გამოთვლის წესი**

1. თუ სპორტული ორგანიზაციის შესაფასებელი წლის საქმიანობის შეფასების მაჩვენებელი უტოლდება 50 ქულას, საბჭო გასცემს რეკომენდაციას დაფინანსების წლიური ოდენობის უცვლელად დატოვების თაობაზე.

2. თუ სპორტული ორგანიზაციის შესაფასებელი წლის საქმიანობის შეფასების მაჩვენებელი 50 ქულაზე ნაკლებია, საბჭო გასცემს რეკომენდაციას, სპორტული ორგანიზაციის წლიური დაფინანსების ოდენობის შემცირების თაობაზე, ქულათა სხვაობის შესაბამისი პროცენტული მაჩვენებლით.

3. თუ სპორტული ორგანიზაციის შესაფასებელი წლის საქმიანობის შეფასების მაჩვენებელი აღემატება 50 ქულას, საბჭო გასცემს რეკომენდაციას, სპორტული ორგანიზაციის წლიური დაფინანსების გაზრდის თაობაზე, ქულათა სხვაობის შესაბამისი პროცენტული მაჩვენებლით.

4. საბჭოს მიერ სპორტული ორგანიზაციისთვის მინიჭებული ქულათა ჯამით გამოთვლილი მატების ან კლების კოეფიციენტი თანხობრივად მრგვალდება ათეულ ლარამდე.

5. დაფინანსების კლებისა და მატებისა მაჩვენებელი გამოითვლება შემდეგი სახით:

ა) სპორტულ ორგანიზაციებთან მიმართებით, რომელთა დაფინანსების მოცულობა შესაფასებელ წელს ნაკლებია 1 000 000 (ერთი მილიონი) ლარზე, პროცენტული მაჩვენებელი გამოითვლება შესაფასებელი წლის დაფინანსების ოდენობიდან;

ბ) სპორტულ ორგანიზაციებთან მიმართებით, რომელთა დაფინანსების მოცულობა შესაფასებელ წელს აღემატებოდა 1 000 000 (ერთი მილიონი) ლარს, პროცენტული მაჩვენებელი გამოითვლება 1 000 000 (ერთი მილიონი) ლარიდან;

გ) სპორტულ ორგანიზაციებთან მიმართებით, რომელთაც არ გააჩნდათ დაფინანსება შესაფასებელ წელს, ან რომელთა დაფინანსება 100 000 (ასი ათასი) ლარზე ნაკლებია, დაფინანსების განსაზღვრისას პროცენტული მაჩვენებელი გამოითვლება 100 000 (ასი ათასი) ლარიდან;

დ) საბჭოს მიერ დადგენილ ქულათა კოეფიციენტი არ ვრცელდება იმ სპორტულ ორგანიზაციებზე, რომელთა სახეობის თაობაზე საქართველოს მთავრობის მიერ დამტკიცებული არის გრძელვადიანი განვითარების სახელმწიფო პროგრამა.

## **მუხლი 7. აღიარების ან/და დაფინანსების შეჩერება ან შეწყვეტა**

საბჭო გასცემს სპორტული ორგანიზაციის აღიარების შეჩერების ან დაფინანსების სრულად ან ნაწილობრივ შეწყვეტის რეკომენდაციას, სპორტული ორგანიზაციის საქმიანობის ამ დებულების მე-4 მუხლით განსაზღვრული წესით შეფასების საფუძველზე.

## **მუხლი 8. საბჭოს გადაწყვეტილების გაფორმება**

ამ დებულების მე-2 მუხლის მე-4 პუნქტში გათვალისწინებული ოქმით გაფორმებული საბჭოს გადაწყვეტილება დასამტკიცებლად წარედგინება მინისტრს, დეპარტამენტის ხელმძღვანელის მოხსენებითი ბარათის საფუძველზე.

### **თავი III. დასკვნითი დებულებები**

## **მუხლი 9. საბჭოს სამდივნო**

1. საბჭოს სამდივნო უზრუნველყოფს საბჭოს სხდომის მომზადებას და საბჭოსთვის შესაბამისი დოკუმენტაციის დამუშავებას და სხდომაზე წარდგენას, ასევე ამუშავებს საბჭოს მიერ მიღებულ დოკუმენტაციას და ამზადებს შესაბამის ოქმებს.
2. საბჭოს სამდივნოს ხელმძღვანელობს საბჭოს მდივანი.
3. საბჭო სამდივნოს შემადგენლობაში შედიან სამინისტროს 4 წარმომადგენელი, საქართველოს პარლამენტის სპორტისა და ახალგაზრდულ საკითხთა კომიტეტის აპარატის 2 წარმომადგენელი, ეროვნული ოლიმპიური და პარალიმპიური კომიტეტების თითო წარმომადგენელი.
4. საბჭოს სამდივნომ შეიძლება შესაბამისი საკითხის თაობაზე, სპეციალური სტუმრის სტატუსით საბჭოს სხდომაზე მოიწვიოს ერთი ან რამდენიმე სპორტული ორგანიზაციის წარმომადგენელი.
5. საბჭოს სამდივნო იკრიბება საბჭოს მდივნის მოწვევით, წელიწადში სულ მცირე ერთხელ.

## **მუხლი 10. გასაჩივრება**

1. საბჭოს გადაწყვეტილების დამტკიცების თაობაზე მინისტრის ბრძანება საჩივრდება კანონმდებლობით დადგენილი წესით.
2. სპორტულ ორგანიზაციას, აღიარებაზე უარის თქმასთან ან შეჩერებასთან დაკავშირებით, უფლება აქვს მინისტრის ბრძანების გამოცემის შემდეგ მოითხოვოს გადაწყვეტილების დასაბუთება, რომელიც უნდა გაიცეს მოთხოვნიდან 10 სამუშაო დღის ვადაში.